

Il parc niev ad Igniu tila ils bikers

Dapi questa stad pon ciclistas e ciclists guder il niev trail da bike ad Igniu denter Rabiis e Surrein. Sco *Andy Monn*, il president da Sumvitg Turissem ha declarau sin damonda dalla FMR, vegn il trail visitaus stediamein da hosps ed indigens ed ei ha dau numerus buns resuns. Las tablas culs nums dils sponsurs agl ur dil vial paran buca d'esser in prighel. Il trail da bike ei numnadamein vegnius planisau da specialists e construius risguardond las mesiras da segirtad. (fmr/sr)

Pagina 3

«Nies parc da bike ad Igniu attira numerus hosps ed indigens»

Dapi questa stad vegn il parc da bike ad Igniu, denter Rabiis e Surrein ella vischnaunca da Sumvitg, nezegiaus stediamein. Silla primavera 2023 vegn era il parc da reiver ad Igniu ad esser semtgaus.

SUSI ROTHMUND/FMR

Il bike trail ei l'emprema part dil parc da divertiment e sport che Sumvitg Turissem realisecha ad Igniu denter Rabiis e Surrein. La fin uost eis el vegnius inauguraus officialmein. Gia avon era il trail da bike denton accessibels ed ei vegnius nezegiaus stediamein questa stad.

Resuns positivs

Sco *Andy Monn*, il president da Sumvitg Turissem, ha constatau ils davos meins, attira il parc gia ussa bia glied. «La stad han numerus indigens e hosps da vacanzas anflau la via ad Igniu el parc, la dentersesiun vegn el plitost nezegiaus dils indigens», di igl um che viseta enqualga il parc da bike culla famiglia. El ei satisfatgs che quel vegn gia l'emprema sesiun frequentaus aschi bein e sco el di ha ei adina puspei dau resuns fetg positivs dalla glied. Il parc che dueigi survir ton al turissem sco alla populaziun dalla regiun seigi in'attracziun tschercada. Aschia ha el gia



Il parc da bike ad Igniu denter Rabiis e Surrein ei in'attracziun per hosps ed indigens. FOTO SUSI ROTHMUND

discurriu cun velociclists dil cantun Berna ni era cun «freaks» da bike da Laax e Flem che han gudiu e giu plascher dil trail cun in iral da rodund 650 meters lunghezia.

Ein las tablas da sponsurs in prighel?

Pil bike trail impunda Sumvitg Turissem rodund 70 000 francs. «La realisaziun ei stada pussevla mo grazia a massa sponsurs», declara il president da Sumvitg Turissem. Visitond il parc ad Igniu croda la pista cun ses carauns en egl sco emprem, mo lu era las bunamein 30 tablas da metal ch'ei pustadas sper quel. Ei quei buca prigulus? «Quellas tablas havein nus empermess als sponsurs principals e quellas havein nus segir buca pustau leu per metter en prighel enzatgi. Il concept dil parc ei vegnius realisau da Allegra Trails GmbH, ina firma spezialisada che ha secapescha era risguardau las mesiras da segirtad. Era *Gabriel Candinas* – igl expert da bike indigen e menader dil project – ha collaborau stretgamein culs specialists durant la planisaziun e realisaziun dil trail», declara Andy Monn e cussegia da far l'emprova per seperschuader ch'ei seigi buca prigulus. Dil reminent hagian gia tschiens persunas fatg diever dil trail e quei tut senza incaps pli gronds. Secapescha vali il principi: «Il diever dil

Reglas

Las reglas che valan el parc da bike ein publicadas sin duas tablas agl ur dil parc, ensemen culla numra d'urgenza pil seracass. Quei per romontsch e per tudestg:

- Il diever dil parc da bike Igniu succeda sin atgna resca e sin agen prighel. Sumvitg Turissem sco interpretider e la vischnaunca da Sumvitg sco proprietari sorprendan negina responsabladad.
- Purtar capellina ei obligatori. Ulteriur equipament da protecziun vegn recumandau.

- Va buca pli spert che Tias pussevladads lubeschan e fai atenziun dallas indicaziuns el parc da bike.
- Respecta igl ambient ed ils auters utilisaders dil parc. Va mo sillas rutas marcadas e dismetta il rumien.
- Il diever dil stabiliment ei mo lubius cun bikes da muntogna ed e-bikes (25 km/ura).
- Annunzia donns immediat a Sumvitg Turissem.

parc da bike Igniu succeda sin atgna resca e sin agen prighel (mira boxa).»

Preit da reiver

Tier l'infrastructura ad Igniu s'auda era ina preit da reiver cun pliras rutas. Ils cuosts per la realisaziun da quella muntan a rodund 50 000 francs. Actualmein vegnan aunc differentas lavurs exequidas vid il grep. Sissum du ei quei era dar ina sort «tetz» che retegn

sch'enzatgei havess da vegnir da surengiu. Tenor Andy Monn po quella preit da reiver vegnir nezegiada sil pli tard la primavera proxima. «Era cheu ein persunas dil fatg involvidas. Nus havein per exempel engaschau il guid da muntogna *Ervin Jacomet*. Las mesiras da segirtad tier aschia in parc ein rigurusas», explica il president da Sumvitg Turissem.

Ulteriusas informaziuns: www.parcigniu.ch.